

Visoki predstavnik naglašava napredak u BiH i pozdravlja daljnji angažman SAD-a

Visoki predstavnik, Paddy Ashdown, tokom ove sedmice održava niz sastanaka u Vašingtonu, uključujući i finalne konsultacije sa američkim State Department-om koje obavlja u svojstvu visokog predstavnika.

Visoki predstavnik se u srijedu uvečer sastao sa američkim senatorom Johnom McCainom, a za četvrtak su zakazani susreti s američkim državnim podsekretarom Nicholasom Burnsom, zamjenikom savjetnika za nacionalnu sigurnost J.D. Crouchem, i predsjednikom Svjetske banke Paulom Wolfowitzem. Pored visokog predstavnika ovim sastancima prisustvuje i prvi zamjenik visokog predstavnika, Larry Butler.

Visoki predstavnik je izrazio svoju zahvalnost na podršci koju američka administracija pruža mirovnom procesu u BiH, a posebno na podršci OHR-u.

Visoki predstavnik je pozdravio obećanje američke Vlade da će i dalje ostati angažirana u Bosni i Hercegovini.

«Evropa je i dalje naša destinacija, ali angažman SAD-a i dalje ima ključni značaj», rekao je visoki predstavnik napominjući da će, pokretanjem pregovora za potpisivanje Sporazuma o stabilizaciji i pridruživanju, prijem u EU od sada biti u centru pažnje procesa provođenja strategije ekonomske i političke tranzicije Bosne i Hercegovine, ali da taj proces znači samo dopunjavanje, a ne isključivanje, daljnje i značajne uloge SAD-a u Bosni i Hercegovini.

«Kontinuirani angažman SAD-a u implementaciji ključnih reformi, uključujući i reforme u oblasti odbrane i policije, ima suštinski značaj», rekao je visoki predstavnik.

«Postizanje uspjeha u ključnim reformama je rezultat združene koalicije međunarodne zajednice, što je omogućilo Bosni i Hercegovini da u deset godina nakon potpisivanja Mirovnog sporazuma u Dejtonu ostvari tako mnogo», dodao je visoki predstavnik.

Visoki predstavnik je naglasio da je hapšenje i transfer u Hag preostalih optuženika za ratne zločine, uključujući i Radovana Karadžića i Ratka Mladića, preduslov za odlučnije odvijanje tranzicije Bosne i Hercegovine iz dejtonske ka briselskoj eri.

Visoki predstavnik je takođe rekao da, iako bh. ekonomija doživljava rast, postignuti napredak u pokretanju ekonomskih reformi sada mora biti ubrzan kako bi građani osjetili efekte ovih reformi u smislu povećanja broja radnih mjesta i pružanja boljih usluga.